

Date – 10/07/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Larsap Gen (Rtd) VK Singh-a'n vawiin khan Govt. Aizawl College, Mualpuiah Indian Red Cross Society Mizoram State Branch tharthawhna hun hmanpuiin, hmalakna kalpui tur a tlangzarh.
2. BJP Mizoram chuan Autonomous District Council chungchanga Governor thuthlukna, State Cabinet Minister lo ni tawh ten Press Conference meuh kova an sawisel an la hre ngailo an ti.
3. Sawrkar laipui chuan Mizoram tiamin tuilian leh leimin tuar state parukte tan cheng vaibelchhe 1066 chhawmdawl na pek a remti.
4. Supreme Court chuan Bihar-a electoral roll Special Intensive Revision (SIR) neih chhunzawm phalna a pe.

<><><>

GOVERNOR

Larsap Gen (Rtd) VK Singh-a'n vawiin khan Govt. Aizawl College, Mualpuiah Indian Red Cross Society(IRCS) Mizoram State Branch tharthawhna hun hmanpuiin, hmalakna kalpui tur a tlangzarh.

IRCS Mizoram State Branch President ni bawk, Larsap Gen (Rtd) VK Singh chuan he hun hi Mizoram tana hun pawimawh tak, mahni mihring puite tana rawngbawl kawnga hmalakna awmze nei leh intuaitharna a ni, a ti a. Mizoram chu tlawmngai pawl chak leh viak tha tak tak awmna a nih thu sawiin, engmah phut let nei hauh lova midangte puih duhna thinlung chu Mizo nuna bet tlat a ni a ti a, puih ngai an awm apianga khawtlang huapa chet chhuah a ni thin chu chhuanawm a tih thu sawiin, midangte rawngbawl sak kawnga khawvel puma pawl hriat hlawh leh awmze nei taka kalpui, IRCS Mizoram State Branch hmang hian Mizoram mipuite chuan rawngbawl na an tichak lehzual thei dawn a ni, a ti bawk.

Larsap chuan Youth Red Cross Unit hmasa ber Govt. Aizawl College leh a pahnihna Govt. T. Romana College-ahte din a ni chu lawmawm a tih thu sawiin, College leh zirna in hrang hrangte chu Youth Red Cross Unit din chho zel turin a sawm a. Red Cross chu pawl mai ni lo, beiseina eng chhinchhiahna a nih thu sawiin, Mizoram chu India ram puma Red Cross Model State ni tura tan lak a duh thu a sawiin, Mizorama Youth Red Cross Unit din hmasa ber Govt. Aizawl College leh a pahnihna Govt. T. Romana College-te hnenah Institutional Membership Certificate a hlan bakah, IRCS Mizoram State Branch hruaitu 7 te hnenah Life Membership Certificate a hlan nghal a ni.

Byte: Larsap Gen (Rtd) VK Singh

IRCS Mizoram State Branch Chairman Pu H. Lalengmawia pawhin he hunah hian thu sawiin, Mizoramah Red Cross Society changtlung leh nung tha tak nei tura hmalak chhoh mek zel a ni a ti a, sawiin, College hotute chu Youth Red Cross Unit din tura tan la theuh turin a chah a ni. Programme hman zawh hian Mizorama Youth Red Cross Unit ding hmasa ber, Govt. Aizawl College Youth Red Cross Unit member-te tana buatsaih, Basic Life Support (BLS) leh First Aid Training session neih zui nghal a ni a. Govt. Aizawl College Youth Red Cross Unit-te hian IRCS Mizoram State Branch atangin blanket 30 leh Oxygen Concentrator an dawng a ni.

<><><>

AIZAWL DISTRICT CRIME REVIEW MEETING

Aizawl District chhunga Police Station hrang hrangah kumin January atanga June thla chhungin thubuai 818 ziahluh a ni a. Thubuai ziahluh atangin inrawk leh rukrukna a tam ber a, za zel a sawmruk leh panga a tling a ni.

Ni hnih chhung awh tur Aizawl District Crime Review Meeting, vawiin khan SP, Aizawl Conference Hall-ah niin DIG Northern Range Pu Ashok Malik an a hawng a, he hunah tarlan anih danin, Aizawl Dist-a rukruk thubuai za zel a sawmpali chu lirthei ruk thubuai a ni a. Thubuai ziahluh tawh zing a 107 chu Court-in chingfel tawhin heng zinga za a sawmriat leh pakua 89 ah thil tisualtute thiamloh chantir an ni bawk.

Rampuma Dan thar (New Criminal Law) nikum July ni 1 atanga hman tan chu mipuite hnena hrilhhriat leh zirtir hna nasa takin kalpui a ni tih meetingah hian tarlan a ni a. Ruihhlo laka mipuite, abik takin thalaite an him theih nan Drugs Awareness Campaign a buatsaih thin a. Hursualna leh hleilenna laka hmeichhiate leh naupangte an him theih nan inzirtirna hun vawi tam tak buatsaih a ni tih tarlan a ni bawk.

Kumin chhung hian Dan lova Mizoram lut ILP nei lo emaw ILP dik lo a lut te vawi 41 enfiah tawh niin, dan bawhchhia mi 195 chu man an nih hnuah thuneitute hnen a hruai an ni tawh. Lirthei ruk Mizoram pawn a kalpui leh hralh a nih loh nan Police Station hrang hrangin zan lamah lirthei veivak endik hna an kalpui thin. Aizawl khawpuiah inrawk leh rukrukna laka mipuite kan him nan leh suahsualna hrang hrang laka mipuite venhim nan Police Station hrang hrang pali (4) te chuan an area theuhah zantin Police Patrolling an nei thin a, tunlai hian Police Patrol hi team 10 ah inthenin Aizawl khawpui hmun hrang hrangah zantin tlaivarin an duty thin a ni.

Aizawl khawpui chhunga Police Station hrang hrangte chuan Central Equipment Identity Register portal chu mobile phone bo chhuichhuah nan tangkai takin an hman mek a. CEIR kaltlangin mobile phone bo 284 lai chhuichhuah niin, hengte hi mobile phone neitute hnenah hlan leh an ni. A ti tha ber Bawngkawn Police Station in CEIR kaltlangin mobile phone bo 143 chhuichhuak tawhin, a dawttu Aizawl Police Station mobile phone bo 104 an chhuichhuak tawh a. Mobile phone bo chhuichhuah kawngah hian Const Ramengmawii, Bawngkawn Police Station chuan thla 4 chhung lekin mobile phone bo 120 a chhuichhuak a ni. A hna thawh that avang hian vawiin khan chawimawina reward hlan a ni bawk.

<><><>

BJP MIZORAM

BJP Mizoram chuan Autonomous District Council chungchanga Governor thuthlukna, State Cabinet Minister lo ni tawh ten Press Conference meuh kova an sawisel an la hre ngailo an ti.

Chakma Autonomous District Council Governor's Rule-a dah chungchanga Home Minister Pu K. Sapdanga’n Larsap thutlukna demna thu a sawi chungchangah BJP Mizoram chuan vawiin khan Press Conference kovin, hei thil Mizorama la thleng ngai lo a ni a ni an ti.

BJP National Minority Morcha Secretary Pu Delson Notlia, MDC chuan tuna CADC chungchanga Governor thuthlukna chu zahawm an ti a, CADC huamchhunga Civil Society Organisation te duhdan ang thlapa kalpui a ni chu mipui zahna dik taka an ngaih thu sawiin CADC mipuite ngenna angin Inquiry Commission din se, sawrkar kalta a eirute leh thil diklo ti zawng zawngte chhuitir a, a mawhphurtu te chu dan anga hrem ngei ni se an duh tih a sawi a ni.

(BYTE)

Pu Delson Notlia chuan CADC chu India rama Autonomous District Council 10 zingah a buai zing bik hle tih sawiin, CEM an thlak zin bakah eirukna leh sum indaih lohna a nasat avangin, financial emergency hial puan a ngai a, hei vang hian CADC-a tlawmngai pawl lian pathum- Young Chakma Association (YCA), Mizoram Chakma Student's Union (MCSU) leh Chakma Mahila Samiti (CMS) te chuan inthurualin, Governor hnenah CADC kal dan tha an tih loh avangin CADC thiata, an tih dik lohte chhui turin an ngen a ni a ti. Governor chuan CADC dinhmun chu uluk taka a en hnua a enkawl na hnuaia awm tul a tih avangin India Constitution in thuneihna a pek angin tun thla July ni 7 khan Governor’s Rule ah thla 6 chung a dah phawt a ni a ti a. Hemi chungchanga Home Minister Pu K Sapdanga’n thuthar thehdarhtute kova, Governor thutlukna siam chu mipui rorelna palzutna ang nia a sawi te, Governor chu Politics a inbeihna atana a hmang te, BJP tan ang a Governor a puhna te chu Mizoram BJP ten an dem thu sawiin, Mizoram BJP chuan CADC chungchangah hian Governor-ah ngaihda an thlen lo a ti a, tunhmaa MNF leh Congress sorkar lai pawhin Mizorama Governor lo awm tawh te chuan ADC te chungchangah thutlukna an lo siam fo tawh thin bakah Governor demna thu sawi chu Mizoramah a la thleng ngai lo a ni a ti.

Nikum December thla khan tuna sorkarna chang mek ZPM Chief Minister leh DC&MA Minister te chuan Governor hnenah CADC chu thiah mai tha an tih thu an lo thlen tawh laia, ZPM-in CADC-ah thuneihna an chan hnua Governor's Rule a dah a nih an hrethiam leh thei lo chu mak an tih thu an sawi bawk a ni.

<><><>

PHC AWARD

Ramchhunga sawrkar damdawiin tha bik tehnaah Mizoram chhunga Primary Health Centre pathum – Kanghmun PHC, Darlawn PHC, leh Buarpui PHC te an tel thar.

National Health Mission, Mission Director Dr. Lily Chhakchhuak chuan India rama sawrkar damdawi in tha bik tehna, National Quality Assurance Standards (NQAS)-ah Kanghmun PHC, Darlawn PHC, leh Buarpui PHC te chu an tling thar

tih vawiin khan a sawi a, tehfung chi hrang hrang hmanga teh a nih hnuah damdawiin thaah puan an ni a ti.

Heti hian Mizoram chhunga Sawrkar damdawi in 32 te chu NQAS national certificate nei tawh an ni a. Tunah hian sawrkar damdawi in 23-in state level certificate nei tawhin national certificate result nghak mek 8 an awm bawk a ni.

Health Minister Pi Lalrinpuii chuan, India rama damdawi in tha bik thlan chhuah zingah Mizorama damdawi in an awm belh zel chu Mizoram tan mellung pawimawh tak a nih thu leh damdawi in, district leh state-a thawktu zawng zawng te thawhrimna leh taimakna chhuanawm a tih thu sawiin, he’ng tehna te hi Sawrkar damdawi in pantu damlote chu a chhawr tangkai bertu tur an nih thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

DISASTER RELIEF

Sawrkar laipui chuan Mizoram tiamin tuilian leh leimin tuar state parukte tan cheng vaibelchhe 1066 chhawmdawl na pek a remti. Heng state te hi Assam, Manipur, Meghalaya, Mizoram, Kerala leh Uttarakhand te an ni a. Union Home Ministry sawidanin Mizoram tan cheng vbch 22, Assam ah cheng vbch 375, Manipur tan cheng vbch 29, Meghalaya tan vbch 30, Kerala tan vbch 153 leh Uttarakhand tan cheng vbch 455 chuang pek a remti a ni. Heng state parukte hi fur ruahsur nasa, tuilian leh leimin avanga harsatna tawk an ni a. Sawrkar laipui chuan heng state te hi theihtawpa chhawmdawl a tum thu a tarlang a ni.

<><><>

BIHAR SIR

Supreme Court chuan Bihar-a electoral roll Special Intensive Revision (SIR) neih chhunzawm phalna a pe. Court chuan rorel na dik a awm theih nan SIR hi tih chhunzawm a phal a. Election Commission chu voter te nihna tichiang turin Aadhar Card, Ration Card leh Voter ID card te endik turin a ti a. Ram danpui hnuaiah Bihar-a Electoral Roll enthat hi phal a ni tih COurt chuan a sawi a. Amaherawhchu Bihar Assembly inthlan dawn hnaihah ngaihbel theih tura he Special Intensive Revision (SIR) an tih chhan leh rampum huapa an tih loh chhan a zawt let thung a ni. He thubu ai hi Justice Sudhanshu Dhulia leh Justice Joymalya Bagchi te thutna bench chuan a ngaihtuah a ni.

<><><>